

DOF PERKUKUH TADBIR URUS SEKTOR AKUAKULTUR, PELESENAN WAJIB KEPADA PENGUSAHA

BERNAMA News | Berita Dalam Negeri | 28/07/2026 | Author: SITI FAUZIAH BT HASAN | Others

SEREMBAN, 28 Julai (Bernama) -- Jabatan Perikanan (DOF) terus memperkukuh tadbir urus sektor akuakultur negara menerusi pelaksanaan pendaftaran dan pelesenan wajib bagi semua pengusaha akuakultur perikanan darat di Negeri Sembilan.

Menteri Pertanian dan Keterjaminan Makanan Datuk Seri Mohamad Sabu berkata ia adalah langkah memastikan industri berkembang secara mampan, berdaya saing dan mematuhi piawaian biosekuriti, sekali gus menyokong agenda keterjaminan makanan negara.

“Pelaksanaan Kaedah-Kaedah Perikanan (Akuakultur Perikanan Darat) (Negeri Sembilan) 2023 adalah langkah strategik memperkemas sistem kawal selia industri akuakultur, selain memastikan aktiviti penternakan ikan darat dilaksanakan secara teratur, selamat dan mematuhi undang-undang.

“Kaedah itu mewajibkan semua individu, syarikat atau pertubuhan yang menjalankan aktiviti itu sama ada menggunakan kolam tanah, kolam simen, tangki, sangkar atau sistem ternakan lain untuk mendapatkan lesen daripada DOF sebelum memulakan operasi,” katanya.

Beliau berkata demikian dalam kenyataan yang dikeluarkan selepas mengadakan lawatan kerja dan sesi libat urus bersama 60 penternak akuakultur, nelayan darat dan pengusaha industri asas tani di Rembau di sini hari ini.

Menurut Mohamad, pelaksanaan pelesenan itu bukan hanya memenuhi keperluan perundangan tetapi memperkukuh biosekuriti, mencegah penularan penyakit ikan, melindungi sumber air daripada pencemaran serta mengawal ancaman spesies ikan asing invasif yang boleh menjejaskan biodiversiti dan ekosistem perairan darat.

Dalam perkembangan lain, Mohamad berkata sehingga kini, Negeri Sembilan merekodkan 440 pengusaha akuakultur darat aktif dengan Port Dickson mencatatkan bilangan tertinggi, iaitu 106 pengusaha, Tampin (70), Jempol (60), Kuala Pilah (56), Rembau (47), Seremban (35) dan Jekebu (24).

Menurut Mohamad, bagi memperluaskan kaedah itu, DOF Negeri Sembilan mengeluarkan 12 lesen akuakultur darat setakat ini dan menyasarkan 60 lesen dikeluarkan sepanjang tahun ini melalui program libat urus, khidmat nasihat teknikal serta bimbingan berterusan kepada pengusaha.

Dalam pada itu, beliau berkata DOF menyalurkan sokongan pembangunan melalui Skim Pengembangan dan Khidmat Nasihat Akuakultur berjumlah RM1.024 juta kepada 30 penternak pada tahun ini bagi membantu meningkatkan produktiviti, keupayaan teknikal serta pengurusan operasi.

“Selain itu, sebanyak 10 penternak turut menerima bantuan menerusi Program Pemerkasaan Agromakanan Negara berjumlah RM500,000 bagi memperkuat kapasiti pengeluaran dan daya saing industri akuakultur di Negeri Sembilan,” katanya.

Mohamad turut berkata sektor perikanan Negeri Sembilan terus menunjukkan prestasi positif apabila Keluaran Dalam Negara Kasar (KDNK) meningkat kepada RM19 juta pada tahun lepas berbanding RM17.6 juta pada 2024, sekali gus mencatat pertumbuhan sebanyak 6.4 peratus.

Beliau berkata sektor berkenaan turut menyumbang 0.03 peratus kepada KDNK negeri dan 0.2 peratus kepada KDNK sektor perikanan negara yang mencerminkan peranan industri itu dalam menyokong pembangunan ekonomi serta keterjaminan makanan negara.

-- BERNAMA

TAG: DOF, tadbir urus, akuakultur, sokongan pembangunan, KDNK, Negeri Sembilan

SFH SFH NMN